

# UMS dicadangkan wujud pengajian penulisan kreatif peringkat diploma

NST 23.5.2013 8

OLEH NAZRINI BADARUN  
nazrini@newsabahtimes.com.my

**TAWAU:** Universiti Malaysia Sabah (UMS) dicadangkan mewujudkan pengajian penulisan kreatif peringkat diploma bagi melahirkan lebih ramai golongan penulis berkualiti di negeri ini.

Pembantu Menteri Pembangunan Sumber dan Kemajuan Teknologi Maklumat Sabah, Datuk Hamisa Samat berkata ia boleh dilakukan dengan mewujudkan kerjasama dengan Dewan Bahasa dan Pustaka (DBP) Sabah.

Menurutnya, usaha berkenaan perlu memandangkan sumbangan golongan penulis pada masa kini penting kepada proses kemajuan dan pembangunan negara.

"Mungkin sudah sampai masanya pihak DBP cawangan Sabah dan UMS bekerjasama mengadakan kursus penulisan kreatif peringkat diploma untuk para pelajar lepasan Sijil Pelajaran Malaysia (SPM).

"Saya yakin dengan pembelajaran yang teratur dan bersistem dapat menerapkan ilmu bantu kepada para pelajar dan graduan agar dapat menghasilkan karya yang berkualiti," katanya.

Beliau berkata demikian pada majlis perasmian Pelancaran Pertandingan Buku Umum Kategori Sejarah 2013 dan Bedah Karya Novel Mariga di Hotel Promenade Tawau, di sini pada Selasa.

Katanya, kerajaan negeri sentiasa menyokong dan berusaha membantu menjayakan program kegiatan bahasa dan sastera, oleh itu DBP dan UMS boleh berperanan menggerakkan idea murni secara berterusan.

"Saya sedar bukan mudah melahirkan penulis yang baik tetapi jika kita tidak mencuba, kita tidak akan tahu seperti pepatah Melayu yang selalu disebut, kalau tidak dipecahkan ruyung manakan dapat sagunya," katanya.

Beliau yang juga Ahli Dewan Undangan Negeri Tanjung Batu berkata, keindahan flora dan fauna negeri ini serta pulau dan gunung ganang yang menakjubkan dan kaya dengan kepelbagaian budaya perlu juga dipromosikan melalui penulisan.

"Kita juga perlu menerbitkan lebih banyak buku-buku ilmiah khasnya buku-buku sejarah dan karya penulis yang hebat perlu diterjemah ke bahasa-bahasa lain antaranya Inggeris, Mandarin, Perancis," katanya lagi.

Sementara itu katanya, melalui pertandingan Menulis Buku Umum Kategori Sejarah yang dianjurkan, rentetan sejarah akan dapat dibukukan.

"Ia juga akan menjadi tatapan masyarakat hari ini dan sebagai panduan serta iktibar bukan mudah membina negara bangsa yang berdaulat," katanya.

Turut hadir pada majlis itu, Pengarah DBP, Haji Jamaluddin Mohd Sulong.